



UPA16/53
20. april 2016
Kalistat Lund

Innuttaasut immikkut tamarmik kiassarnermut atukkaminnik taamaallaat akiliisaleqqullugit, Nukissiorfinnit kiassarneqartut tamarmik immikkut uuttuutilersorneqarnissaannut Naalakkersuisut peqquneqarnissaannik Inatsisartut aalajangiiffisassaattut siunnersuut. Tamanna aallarteqquneqarpoq kingusinnerpaamik ulloq 1. januaari 2017.

(Inatsisartunut ilaasortaq Michael Rosing, Demokraatit)

Inatsisartunut Ilaasortap Michael Rosing-ip siunnersuutaa, ajornartorsiummut tikillattaarneqartuartartumut aaqqiissutissatut pitsaasutut isigaarput.

Inigisanut attartornermut akiusut qaffasissortaqaqisut ilarujussua, ilaatsigut allaat 40%-ia angullugu, kiassarnermut atuinnermit aallaaveqartartoq ilisimaneqarpoq. Inigisamut akiliutaasartup ilarujussua, inissiarsuarmioqatigiit tamarmiullutik kiammik atuinnermit agguaqatigiissitsinikkut angissusilerneqartartoq, atuivinnermit aallaavilimmik taarserneqarnissaa siunniullugu pilersaarusiortoqalernissaa isumaqatigaarput.

Tamatsinnit ilisimaneqarpoq inissiattoqanngorsimasut ullutsinnut naleqqutivikkunnaarsimagaluartut suli najugaqarfissatut neqeroorutaajuarmata. Isumaqaarpugut piginnittut matumani akisussaaffeqartut aaqqiissutissanik iliuuseqarnissaminnut. Ilisimavarput nutaanik inissialiortiternerit aallaavigalugit kipungaffiusunik aaqqiartuartaartoq, kisianni tamanna sivisuumik piartuuarfiusussaammat isumaqaarpugut tamatigut tamanna utaqqiinnarneqartariaqanngitsoq.

Inissiat pisoqqat kiassaasersorneqarsimaneranni periuserineqarsimasut aallaavigalugit, nutarterinissani nalinginnaasunik uuttortaasersuisoqarsinnaanngippat, periaatsit allat siunnersuuteqartup aamma tikissimasai atorlugit aaqqiisoqarnissaa pissasoq isumaqaarpugut, tassa uuttuutit kiassaatinut ataasiakkaanut ikkunneqartartut atorlugit.

Kiassarnermut akilersueriaatsip naleqqutinngitsutut nalilerneqartup allanngortinneqarnissaani atuisut illersorneqarnissaat pisariaqarpoq. Attartortut pigilinngisaannagassaminnik qaammatit tamaasa akilersuisut nammagassinneqartariaqanngillat suli allanik pigiligassarinnngisaannik. Taamaattumik nutarterinissat aalajangiunneqartariaqarput makku patsisigalugit:

Attartortorpassuit ukiorparujussuarni killilimmik iliuuseqariarsinnaatitaasimammata inimi attartukkaminni kiammik atuinnerminni namminerminnut sunniutilimmik periaaseqarnissaminnut, soorlu atuilluarniarnerup tungaasigut il.il., ilisimaneqarmallu immikkut uuttuuteqartitsinermit atuinnerup tallimararterutai tikillugit annikinnerusumik atuilersoqartartoq, pissutsit taamaasimanerisa kingunerannik inigisamut akiliutigineqartartut "pisariaqanngitsumik" qaffasittuartaqarsimasut

Aammalu kiammik atuinnermi sipaarnerup sunniutai attartortunut ataasiakkaanut sunniutigisartagai malunniunneq ajormata, sipaarnissap piuumassuseqarfigineqarnera killeqarnerusartoq ilisimaneqarpoq, tassa taakku qulaani taaneqartut, atuinnerup tallimararterutaanik annertussusillit, tassuunakkut pisariaqanngitsumik nukimmik atuisoqarpoq.

Taama oqaaseqarluta siunnersuut tunngaviatigut taperserparput, Naalakkersuisullu allannguutissatut siunnersuutaat aamma tunngaviatigut taperserlugu, Sanaartornermut Ataatsimiititaliami aappassaaneerneqartigani suliarineqassasoq inassutigaarput.